

SANTIAGO

Santiago Marĩpuyarā āārĩpererogue waasirinerārē gojadea

1 ¹Yu Santiago i pũ merā musārē òãdorea. Yu Marĩpure, irasũ āārĩmakũ marĩ Opũ Jesucristore moãboegu āārā. Musārē Israel bumarārē pe mojõma pere su gubu peru pẽrẽbejari buri marārē āārĩpererogue waasirinerārē gojáa.

Marĩpu masĩrĩ sĩrĩmarē gojadea

²Yaarā, musārē wári gajirosũperi ñerĩ waamakũ, gajipoe gũñaña marĩrõ ñerõ tarirā, òãrõ usuyari merā āārĩnkõãka! ³Musā ire masĩa. Ñerõ tarirā: “Marĩpu yure iritamugukumi”, ārĩ buremurirē pirimerā, gũñaturari merā ĩgũrē buremunemorãkoa. ⁴Musārē Marĩpure buremurirē neõ piriro marĩrõ gũñaturanĩkõãrõ gāamea. Gũñaturanĩrā, òãrõ pẽmasĩrā, Marĩpu ĩgũ masĩrĩ sĩrĩrē oparā āārĩrãkoa.

⁵Musā masĩrĩrē opamerā, Marĩpure sērẽka! Musā sērẽmakũ pẽgu, musārē sĩgukumi. Neõ turiro marĩrõ merā āārĩpererā ĩgũrē sērẽrārē wári masĩrĩ sĩgukumi. ⁶Irasirirā irire sērẽrā: “¿Yure sĩgukuri?” ārĩ gũñamerāta buremurĩ merā sērẽka! Sugu: “¿Yure sĩgukuri, o sibirikuri?” ārĩ gũñarikũgu, dia wádiyama makũrĩ gorawayuro irirosũ ĩgũ gũñarĩrē gorawayunakumi. ⁷Irasirĩgu: “¿Yure sĩgukuri, o sibirikuri?” ārĩ gũñagũ: “Marĩ Opure sērẽrĩrē opagũkoa”, neõ ārĩ gũñabirikõãburo. ⁸Sunurē gajirosũ, gajinurē gajirosũ

gũñami. Irasirĩgu: “Āsũ irigura”, ārĩ gũñabirisĩã, keoro neõ irimasĩbemi.

⁹Sugu ubu āārĩgũ āārĩkeregu, Jesũre buremusĩã, Marĩpu iũrõrē ubu āārĩgũ meta āārĩmi. ĩgũyagu āārĩmi. Irasirĩgu usuyaburo. ¹⁰Gajigu wári doebiri opagu, ĩgũya doebiri peremakũ ĩãkeregu, Jesũre buremusĩã, usuyaburo. Marĩpu iũrõrē ĩgũya doebiri ubu āārĩrĩ āārā. Tá goori irirosũ pererokoa. ¹¹Abe murĩja, burõ asimakũ, tá ñaĩa, iri gooride ñaidĩjakoa. Iri goori òãrĩ āārĩkerero, pereakõãkoa. Āsũta waakoa doebiri opagure. ĩgũ moārĩ merāta boakumi.

Ñerõ taririre, irasũ āārĩmakũ ñerõ iriduare gojadea

¹²Jesũre buremugũ ñerõ tarikeregu: “Marĩpu yure iritamugukumi”, ārĩ buremurirē piribi, usuyami. ĩgũ gũñaturari merā tariwerederõ puru, Marĩpu ĩgũrē: “Òãrõ irimi”, ārĩgukumi. Irasirĩgu ĩgũrē ãmugasigũ perebiri okari sĩgukumi^a. Āārĩpererā ĩgũrē maĩrārē: “Iri okarire sĩgura”, ārĩdi āārĩmi. ¹³Sugu ñerĩrē iriduagu: “Marĩpu yure ñerõ iriduamakũ yámi”, ārĩ gũñabirikõãburo. Marĩpu neõ ñerĩrē iriduabemi. Irasũ āārĩmakũ, neõ marĩrē ñerõ iriduamakũ iribemi. ¹⁴Āsũ garũ āārā. Masaka ĩgũsā ñerĩ waribejari gũñarĩrē piribirimakũ, iri gũñarĩ ĩgũsārē ñerõ iriduamakũ yáa. ¹⁵Irasirirā ĩgũsā ñerĩ waribejari gũñarĩrē pirimerā, puru iri ñerĩ waribejarire irirākuma. Iri ñerĩ iririre pirimerā, puru perebiri peamegue waarākuma.

^a 1.12 Sugu ũma birimasũ gajirā nemorõ òãrõ ũmagũ, olivo wãĩkudima pũrĩ merā icidea berõre wajatakumi. Masaka iri berõre ĩgũya dipurugue peokuma, gajirārē ĩgũ wajatadeare ĩmurā. I irirosũ, sugu Jesũre buremugũ ñerõ tarikeregu: “Marĩpu yure iritamugukumi”, ārĩ buremurirē piribi, ãmugasigũ perebiri okari wajatagukumi. Iri ãmugasigũ perebiri okari wajatari, i berõre wajatari irirosũ āārā.

¹⁶Yaará yu maírā, diayeta gūñaka!
 “Marīpu yure ñerō iriduamakū yámi”,
 neō ārī gūñabirikōāka! ¹⁷Marīpu
 ūmugasigue āārīgú marīrē ōārī,
 diayema ditare sími. Ígū abe ūmumurē,
 ñamimurē, neñukādere iridi āārími.
 Neō gorawayubemi. Irasirigu ígū
 āārīderosūta āārínkōāgukumi. ¹⁸Ígū
 gāamederosūta ígūya kere diayema āārīri
 merā marīrē ígūyarā āārímakū iridi
 āārími, ígū pūrā āārīpūrōriburo, ārīgū.

**Marīpuya kerere péra, ígū
 dorerosūta irika! ārī gojadea**

¹⁹Yaará yu maírā, ire masíka! Musā
 āārīpererārē Marīpuya kerere ōārō
 péro gāamea. Gajirā musārē weremakū
 péra, ōārō gūña odorāgue ígūsārē
 wureka! Mata guabirikōāka! ²⁰Sugu
 noó gāamerō guagu, Marīpu gāamerīrē
 iribemi. ²¹Irasirirā āārīpereri musā
 ñerō gūñarīrē, ñerī iririre pirikōāka!
 Marīpuya kerere musā pédeare buremurī
 merā ōārō irika! Ígūya kerere pémakū,
 ígū turarī merā musārē peamegue
 waabonerārē taugukumi.

²²Ígūya kere pédeare ōārō irika! Iri
 kerere pékererā, irire irimerā, musā
 basī ārīkatori merā: “Ōārō yáa”, ārī
 gūñarākoa. ²³Musā Marīpuya kerere
 pékererā, irire irimerā, sugu masakū
 ígūya diapure diuru merā āññagū irirosū
 āārā. ²⁴Ígūya diapure āññadero puru,
 gajirogue waa, ígū deyorire mata
 kātīakōākumi. Irasirirā, ígū kātīderosūta
 Marīpuya kerere péadero puru, mata
 kātīkōāa. ²⁵Gajigu gapu Marīpuya
 kere pédeare gūñanígū, kātībirikumi.
 Irasirirā, ígū irirosū irirā, marī pédeare
 kātībirikōa. Marīpu dorerire irinírākoa.
 Irasirigu Marīpu marīrē marī iriri merā
 usuyamakū irigukumi. Ígū doreri keoro
 āārā. Irire marīrē pídi āārími, iri merā
 ígū gāamerīrē irimasīburo, ārīgū.

²⁶Sugu: “Marīpūre buremua”, ārī
 gūñakeregu, gajirārē werewuarire,
 ígūsārē ñerō werenírīrē pīribirimakū,
 ígū: “Marīpūre buremua”, ārīrī wjamáa.
 Ígū basita ārīkatogu yámi. ²⁷Marī
 diayeta Marīpu āārínígūrē buremurā,

āsū iriro gāamea. Pagusāmarā marīrārē,
 wapiweyarādere ígūsā ñerō tarimakū
 iārā, ígūsārē iritamurō gāamea. I ūmu
 marā ñerī irirā irirosū iribirikōārō
 gāamea.

Masakare surosū iāka! ārī gojadea

2 ¹Yaará, musārē Jesucristo
 marī Opū ōatarigure buremurā
 masakare surosū iārō gāamea. Surāyeri
 masakare ōārō irirā, gajirādere ōārō
 irika! ²⁻³Musārē i keori merā weregura.
 Wári doebiri opagu oro merā iridea
 mojōsūrī túsārī berorīre opagu ōārī
 surī sāñagū, musā Jesúre buremurā
 nerērōgue aarimakū iārā, ígūrē ōārō
 merā: “Ōō, i ōārī doaripērōgue doaka!”
 ārībukoa. Gajigu bopogu boaro daro
 suriro sāñagū aarimakū iārā, ígū gapure
 ōārō bokatīrīñeābiribukoa. Gajipoe irirā
 ígūrē: “Irota dujaka!” o “Ōō yebague
 doaka!” ārībukoa. ⁴Musā ígūsārē surosū
 iāmerā, ñerō gūñarī merā: “Wári doebiri
 opagu, bopogu nemorō āārími”, ārīrā
 yáa.

⁵Yaará yu maírā, yure péka! Marīpu
 i ūmugue: “Boporā āāríma”, masaka
 ārīrārē beyedi āārími, ígūrē wáro
 buremurī opamurārē. Ígūrē maírārē:
 “Sīgura”, ārīdeare ígūyarārē dorerogue
 opaburo, ārīgū, ígūsārē beyedi āārími.
⁶Marīpu boporārē beyekeremakū, musā
 gapu ígūsārē buremubea. Doebiri
 oparā gapu musārē buro poyari
 merā moādorenama. Ígūsāta musārē
 weresārīrē beyerimasā purogue
 weresāmurā āñwāgānama. ⁷Musā: “Jesús
 ōāgūyarā āāríma”, ārīsūrā āārā. Doebiri
 oparā gapu ígūyamarē ñerō werenirā
 āāríma.

⁸Marīpu marīrē doregu ígū dorerire
 gojadea pūgue āsū ārīdi āārími: “Mū
 basī maírōsūta mū pūro āārīrādere
 maíka!” Musā i dorerire irirā, ōārīrē
 irirā yáa. ⁹Musā gajirārē surosū
 iāmerā ñerō irirā yáa. Marīpu doreri
 gojadea pūgue irasirirārē āsū ārī
 gojasūdero āārībū: “Marīpu dorerire
 tarinūgārā āāríma”. ¹⁰Sugu āārīpereri
 Marīpu dorerire irikeregu, su wārē

tarinugāgū, ñerō iridea wajare opami. Irasirigu āārīpereri Marīpu dorerire tarinugāgū irirosū āārīmi. ¹¹Marīpu āsū ārīdi āārīmi: “Gajigu marāpo merā ñerō iribirikōāka!” Gajidre ārīdi āārīmi: “Masakare wējēbirikōāka!” Irasirigu sugu, gajigu marāpo merā ñerō iribirikeregu, masakare wējēgū, Marīpu dorerire tarinugāgū āārīmi. Ñerō iridea waja, waja opami. ¹²Marīpu īgū dorerire marīrē pīdi āārīmi, iri merā īgū gāāmerīrē irimasīburo, ārīgū. īgū masakare īgūsā ñerō iridea waja, wajamoāgū āārīmi. īgū dorerire marī irideare: “Ōāgorabu”, marī iribirideare: “Ñegorabu”, āri beyegukumi. Irasirirā īgū dorerire irika! īgū gāāmerōsūta werenīka! ¹³Marīpu īgū āārīpererā ñerārē peamegu wajamoārīnu ejamakū, masakare bopoñarī merā īāmerārē bopoñarī merā īābirikumi. Gajirārē bopoñarī merā īārā gapure bopoñarī merā īāgukumi. īgūsārē wajamoābirikumi.

**Jesúre buremurirē, irasū
āārīmakū ōārī iririre gojadea**

¹⁴Yaarā, ire péka! Sugu ōārīrē iribi: “Jesúre buremua”, ārīrī wajamāa. Irire ārīrī merā dita tausūbirikumi. Peamegu waagukumi. ¹⁵Jesúre buremugū, o Jesúre buremugū, surī gorawayumerā, baari mērogā opamakū īārā, ¿nasirirākuri musā? ¹⁶īgūsārē: “Ōārō waaburo musārē. Ōārī surī bokarā, baayapirā waaka!” ārīrā, īgūsā gāāmerī gapure sibirimakū, musā ārīrī neō wajamāa. ¹⁷I irirosū āārā. Sugu: “Jesúre buremua”, ārīgū, ōārī gapure iribirimakū, īgū: “Jesúre buremua”, ārīrī neō wajamāa.

¹⁸Gajipoe irigu yu wererire péduabi gapu yure āsū ārībukumi: “Sugu Jesúre buremurī opami. Gajigu gapu Jesúre buremurīkeregū, ōārīrē yāmi”, ārībukumi. īgū irasū ārīmakū pégu, yu īgūrē āsū ārībukoa: “Masaka sugu ōārī iririre neō īābirikererā, īgūrē: ‘Jesúre buremugū āārīmi’, ārīmasībirikuma. Gajigu gapu īgū ōārī iriri merā gajirārē

īgū Jesúre buremugū āārīrīrē masīmakū yāmi”, ārībukoa. ¹⁹Musā: “Marīpu suguta āārīmi”, āri buremua. Musā irasū āri buremumakū ōāgorāa. Wātēa ōārīrē neō irimerāde irire buremuma. īgūsā Marīpu āārīrikurire masīma. Irasirirā īgūrē gūirā, naradama. ²⁰Musā pémasīmerā āārā. Irasirigu ire musārē werenemogura, pémasīdoregu. Sugu: “Jesúre buremua”, ārīgū ōārī gapure iribirimakū, īgū: “Jesúre buremua”, ārīrī neō wajamāa. Jesúre buremugū meta āārīmi.

²¹Iripoeguemu marī ñekū Abraham irideare gūñaka! “¿Diayeta īgū yure buremurī?” ārīgū, Marīpu īgū magū Isaare ūtāyeri merā iridea soepeorogue wējē soepeodoredi āārīmi. Irasirigu Abraham Marīpu dorederosūta īgū magūrē āi wējēbu iridi āārādīmi. Marīpu īgū dorerire Abraham tarinugābirimakū īāgū, īgūrē: “Mu magūrē wējēbirikōāka!” ārīdi āārīmi. Irasirigu īgūrē: “Diayeta yure buremumi, ōāgū āārīmi”, āri īādi āārīmi. ²²Irasirirā musā ire masīa. Abraham Marīpūre buremusīā, īgū doredeare iridi āārīmi. Irasū āārīmakū īgū doredeare irisīā, Marīpūre buremurī opatarigu dujadi āārīmi. ²³Irasiriro Marīpūya werenīrī gojadea pūgue Abraham irideare gojaderosūta waadero āārībū. Āsū āri gojasūdero āārībū: “Abraham Marīpūre buremudi āārīmi. īgū buremumakū īāgū: Marīpu īgūrē: ‘Ōāgū āārīmi’, āri īādi āārīmi”, āri gojasūdero āārībū. Irasū āārīmakū, Marīpu īgūrē: “Abraham, yu merāmū āārīmi”, ārīdi āārīmi.

²⁴Irasirirā Abrahāyamarē gūñarā, musā ire masīa. Sugu: “Marīpūre buremua”, ārīgū, ōārī gapure iribirimakū īāgū, Marīpu īgūrē: “Ōāgū āārīmi”, āri īābemi. Gajigu gapu diayeta Marīpūre buremugū ōārīrē yāmi. Irasirimakū īāgū, Marīpu īgūrē: “Ōāgū āārīmi”, āri īāmi. ²⁵Gaji iripoeguemo ūma merā ñerō irideo Rahab wāikugo irideare gūñaka! Josué iriunerā igoya makāgue īādurirā ejamakū, īgūsārē iritamudeo āārīmō. Igoya makā marā īgūsārē boka

wējērī, ārīgō, igoya wiigue ĩgūsārē duḏdeo āārīmō. Pærū ĩgūsā duri dujariri maarē ĩmudeo āārīmō. Igo Marĩpuyarārē iritamurĩ merā Marĩpũre igo buremurirē ĩmudeo āārīmō. Irasirimakū ĩāgū, Marĩpũ ĩgore: “Ōāgō āārīmō”, ārī ĩādi āārīmī. ²⁶Āsū āārā. Masakū yũjupũrā marĩmakū, ĩgũya ḏupũ okabirikoa. Sugu: “Marĩpũre buremua”, ārīgū, ōārī gapure iribi, diayeta Marĩpũre buremubemi. Irasiro ĩgũ: “Marĩpũre buremua”, ārĩrĩ neō wajamāa. Yũjupũrā marĩrĩ ḏupũ, boari ḏupũ irirosū āārā.

Marĩya disi wiririre gojadea

3 ¹Yaarā, ire musā masīa. Marĩpũ gũa ĩgũyare buerimasā buerire, gajirā moārĩmasā iriri nemorō ĩā beyegukumi. ĩgũyare keoro buebirimakū ĩāgū, gajirā nemorō gũare wajamoāgukumi. Irasirirā musā watopegue āārĩrā mērāgā dita gajirārē buerimasā āārĩburo. ²Marĩ āārĩpererā wārī ōārō iribirire yāa. Sugu ñerī neō werenĩbi: ōāgū Marĩpũ gāāmerĩ ditare irīgũ āārĩmi. Gaji ñerō iriridere neō iribemi. ĩgũ ñerĩ werenĩrĩ ĩgũya disi wiririre kāmutamasiĩgũ, āārĩpereri ĩgũya ḏupũgue āārĩrĩ merā gaji ñerō iriridere kāmutamasiĩmi.

³Marĩ werenĩrĩmarē keori merā weremakū i irirosū āārā. Marĩ kōme berore caballuya disire túsākōa. Irasirirā i berogā merā, ĩgũ wāgu waibũ āārĩkeremakū, tũāgāmenú, marĩ waadũaro waamakū irikoa. ⁴Doódirude irasũta āārā. Iriru wādiru āārĩkeremakū, mirũ burō wējāpukeremakū, wejatugũ mērĩ majīgā merā dita iriru waarōre wejatukumi. ⁵Marĩ werenĩrĩ irasũta āārā. Marĩya nediru médirugā āārĩkeremakū, marĩya disi wārī: “Masĩtaria”, ārī werenĩrĩ wiria. Āsū āārā. Peame marĩ mērĩmegā diikeremakū, wārī makānũurē ũjũmakū irikoa. ⁶Irasiro marĩya disi nediru merā ñerĩ werenĩrĩ, i peame irirosū āārā. Marĩya ḏupũgue, marĩya nediru su wāīgā āārĩkeremakū, marĩ ñerĩ werenĩrĩ marĩrē āārĩpereri gajirosũperi ñerĩrē

irimakū irikoa. Irasiro peame gajinorē ũjũwāgā, poyanorērō irirosū, marĩ ñerĩ werenĩrĩ, marĩ i ũmũgue okarinũrĩrē ōārō āārĩrĩrē poyanorēmākũ yāa. Marĩ ñerĩ werenĩrĩ, wātĩ ñerĩ iridorerire irirā yāa. ⁷Masaka ĩgūsāyarā ejorārē kāmutarosū āārĩpererā makānũũ marā waimurārē, wúrārē, pĩrũārē, dia marārē kāmutamasiĩma. Neōgoraguedere ĩgūsānorē kāmutamasiĩanerā āārĩmā. ⁸ĩgūsārē kāmutamasiĩkeregu, neō sugu masakū ĩgũ basi ĩgũ werenĩrĩrē kāmutamasiĩbemi. Irasirirā marĩ ñerĩrē werenĩduabirikererā, ñerĩ werenĩa. Āñā kũrĩmakū ĩgũya nima merā masakare wējērō irirosū, marĩ ñerĩ werenĩrĩ merā gajirārē ñetariro yāa.

⁹Marĩ werenĩrĩ merā Marĩpũ marĩ Opure: “Ōātaria”, ārī, ũsũyari sĩa. Marĩ werenĩrĩ merāta masakare: “Ñerō waaburo ĩgūsārē”, ārī werenĩa. Marĩpũ marĩ masaka āārĩpererārē ĩgũ irirosū āārĩmakū irikeremakū, marĩ gāme ñerō werenĩa. ¹⁰Su disita ōārĩ werenĩrĩ, irasũ āārĩmakū ñerĩ werenĩrĩ wiria. Yaarā, irasiribirikōārō gāāmea. ¹¹Deko wiriri gobere ōārĩ wiriro, ñerĩ wiribirikoa. ¹²Yaarā, musā ire masīa. Higueraĩgũ, ĩguĩ dukakũbirikoa. Iguĩgũ, higuera dukakũbirikoa. Misōrĩ deko wiriri gobere moākũri dekode wiribirikoa. Marĩde i irirosū ōārĩ ditare werenĩrō gāāmea.

Diayema masĩrĩ āsū āārā, ārī gojadea

¹³Musā watopegue sugu ōārō masĩgũ āārĩgũno, ōārĩrē irinĩkōāburo. “Gajirā nemorō masĩarinugāa”, ārĩbi, ĩgũ masĩrĩ merā ōārĩrē iriburo. Irasirimakū ĩārā, gajirā ĩgũrē: “Ōārō masĩmi”, āārĩrākuma. ¹⁴Musā gajinorē oparārē burō ubu ĩaturirā, ĩgūsā nemorō āārĩduarā, musāya āārĩburi ditare iridũarā: “Masĩtarinugāa”, ārī gũñabirikōāka! Masā irasũ ārī gũñarā, ārĩkatorikũrā, diayema āārĩrĩrē keoro werenĩrā meta yāa. ¹⁵Musā: “Masĩtarinugāa”, ārī gũñarĩ, Marĩpũ gũñarĩ sĩrĩ āārĩbea. I ũmũ marā gũñarĩ, wātĩya āārā. ¹⁶Masaka gajirārē ubu ĩaturi, ĩgūsāya āārĩburi ditare

iriduarā, gāme guaseonírā āāríma. Āārīpereri gajirosūperi ñerírē yāma. ¹⁷Marīpu masírī sīrī oparā gapu ōārā āāríma. Gāme guaseoduamerā, gajirārē iritamurā, gajirā wererire buremurī merā pérā, boponarī merā iārā, ōārírē irirā, masakare surosū iārā, irikatoro marírō irinírā āāríma. ¹⁸Gajirā merā ōārō āārīduarā, gāmekēārō marírō ōārō siñajārī merā āārīmākū iriduarā, diayema iririre irinírā āāríma.

I ūmumarē gāamerā, Marīpure gāamebema, āri gojadea

4 ¹¿Nasirirā gāme guaseo, gāmekēārī musā? Āsū āārā. Musā gūñarīgue musā ñerírē iriduari, ōārírē iriduari merā gāmekēārī irirosū āārā. ²Gajinorē musā gāāmea. Irasirirā irire opabirisīā, masakare wējēa, ĩgūsāyare ēmaduarā. Gajigu gajinorē opamakū iārā, ĩgūrē ubu iaturia. Irasirirā ĩgūyare opabirisīā, gāme guaseo, gāmekēāa. Musā Marīpure sērēbirisīā, musā gāamerírē opabea. ³Gajipoere gajinorē sērēkererā, ñerō gūñarī merā sērēa. Musā basi musā ñerī űaribejari ditare iriduarā sērēa. Irasirigu Marīpu musā sērērírē sībemi. ⁴Musā sugo nomeō marāpukugo āārīkerego gajigūre gāāmegō irirosū āārā. ¿Musā ire masiberi? Sugu i ūmu marā ñerírē irirā irirosū iriduagu, Marīpure gāāmebemi. I ūmu marā ñerírē irimakū ĩāgū: “ĩgūsā irirosū irigura”, āri gūñagū, Marīpure iaturigu dujami.

⁵Marīpūya werenírī gojadea pūgue irire āsū āri gojasūdero āārībú: “Marīpu Ōāgū deyomarīgūrē marírē pídi āārímí marí merā āārībure. Ōāgū deyomarīgū marírē maīgū, marí ñerírē iriduamakū gāāmebemi”, āri gojasūdero āārībú. Iri gojadea ubu āārírī meta āārā. Āārírōma āārā. ⁶Irasirigu Marīpu marí ñerírē irinemobirikōāburo, ārīgū, marírē boponarī merā iā, ōārō iritamumi. Irasiriro ĩgūya werenírī gojadea pūgue āsū āri gojasūdero āārībú: “Gajirā nemorō āārā”, āri gūñagūrē Marīpu iritamubemi. ‘Yū ubu āārīgú āārā, yure iritamuka!’ ārīgū gapure ōārō

iritamumi”, āri gojasūdero āārībú. ⁷Irasirirā Marīpu dorerire buremurī merā irika! Wātī dorerire iribirikōāka! Musā ĩgūrē pēbirimakū ĩāgū, musārē piri, duriwāgākōāgukumi. ⁸Marīpu puroge ĩgūrē: “Yū merā āārīka!” āri ejanugārā irirosū irika, ĩgūrē masīnemoduarā! Irasirimakū ĩāgū, musā puroge ejanugāgū irirosū irigukumi musārē iritamunemobu. Musā ñerō irirā āārā. Irasirirā ñerō iririre pirika! Musā Marīpūyare irirā, o i ūmu marā irirosū irirā: “Ōāgorāa”, āri gūñadāa. Ire irasū āri gūñabirikōāka! I ūmu marā irirosūta ñerírē irimakū, ñegorāa. Marīpūya ditare irimakū, ōāa. ⁹Musā ñerō iririre gūñarā, űsuyari merā būrirono irirā, būjawereri merā oreka! Musā ñerō iririre guyasírírī merā, būjawereka! ¹⁰Marí Opure: “Mū ĩūrōrē yū ñegū, ubu āārīgú āārā, irasirigu yure iritamuka!” āri sērēka! Musā irasū āri sērēmākū: “Mūrē iritamugura, yaagu, ōāgū āārā”, āri ĩāgukumi.

Musā Jesúre buremurā musā basi gāme werewuabirikōāka! āri gojadea

¹¹Yarā, musā Jesúre buremurā musā basi gāme werewuabirikōāka! Gajirārē ñerī werenírā, o ĩgūsārē werewuarā, Marīpu marírē gāme maĩdoredeare tarinugārā yāa. Irire tarinugārā: “Iri doreri ōābea”, ārírā irirosū yāa. Irasirirā Marīpu dorerire: “Ōābea”, āri werewuarā: “Yū Marīpu nemorō doremasīā”, ārírā irirosū yāa. ¹²Marīpu suguta masakare ĩgū dorerire pídi āārímí. ĩgū suguta ĩgūsā iririre iā beyemasími. Masakare taumasími, o peamegue béomasími. Irasirirā musā gapu: “Gajirā masakare werewuamasīā”, āri gūñabirikōāka!

Ñamigāgue marí iriburire masībirimarē gojadea

¹³Dapagorare gajire weremākū, ōārō péka! Musā surāyeri: “Dapagā, o ñamigā gaji makāgue su bojori moā, wáro niyeru wajatarākoa”, āri werenía. Irasū āri werenírārē āsū āri weregura. ¹⁴Musārē

ñamigägue waaburire neö masíbea. Marí i ñmugue okarí, ñimiká boyoripoe duji, mérögá pũru perero irirosú äärá. Marí i ñmugue äärí, mérögá pũru boakõärákoa. ¹⁵Irasirirá musäsäre äsú äri werenírí. ¹⁵gäämea: “Marípũ gäämemakũ, okaråkoa ire, o gajire irimurá”. ¹⁶Muså gapũ: “Marí masía, irasirirá marí gäämerõ äsú iriråkoa”, äri werenía. Iri äärípereri muså irasú äri werenírí, ñegoråa. ¹⁷Irasirirá: “Marí äsú irirå, õärírë iriråkoa”, äri masikererå, irire irimerå, ñerírë irirå yåa.

**Wári doebiri oparårë
waaburire gojadea**

5 ¹Muså wári doebiri oparå yure pëka! Muså ñerõ tariråkoa. Irasirirå ire güña, buro bujawereri merå gaguiní oreka! ²Musåya doebiri boakõårokoa. Musåya suríre burua baaråkuma. ³Muså niyeru koeri, oro, plata merå iridea koeri muså duripídea gũrawijiakõårokoa. Irasú waamakũ, muså niyerure maísíå, duripídeare masisũrokoa. I niyeru muså maírí, peame gajinorë soebéorosú musårë poyanorëmakũ irirokoa. Dapagorare muså, i ñmũ pererínũ ejaburo dupiyuro, wåro niyerure duripírå yåa. Irire duripíri waja buro wajamoåsũråkoa. ⁴Musåya pooerire moånerårë wajaribeaa. Irasirirå musårë: “Guare muså åråderosũta wajarika!” äri gaguiníma. Ígũså irasú äri gaguiníríre marí Opũ ígũrë wereboerårë doregu pémi. ⁵Muså i ñmugue okarå, wári doebiri opåa. Muså opari merå muså gäämerí ditare yåa. Muså irasirirí waja wajamoåsũråkoa. Wekũre ígũså wëjëburi dupiyuro õårõ baa, díikũgu irirosú äärå. ⁶Muså ñerõ irimerårë: “Ñerõ yåma”, äri, peresugue äiwågå: “Wëjëka!” årå, muså ígũsårë iririre kåmutamasíña marírõ.

**Jesucristo i ñmugue dupaturi
aariburire marírë õårõ yũro
gäämea, äri gojadea**

⁷Irasirirå yaarå, marí Opũ Jesucristo i ñmugue dupaturi aariburire güñaturari

merå õårõ yũka! Pooe opu ígũ otedea dukakuburire õårõ yũkumi. Ígũya pooere otedero pũru, deko merëburire, irasú äärímakũ ígũ otedea puri, masåburire õårõ yũkumi. ⁸Musåde ígũ irirosũta õårõ yũka! Marí Opũ dupaturi aariburo mérõ duyåa. Irasirirå güñaturari merå ígũrë buremurírë neö piriro marírõ merå ígũ aariburire õårõ yũnikõåka!

⁹Yaarå, Marípũ musårë wajamoårí, årírå, gåme turibirikõåka! Ígũ äärípererå ñerårë wajamoågũ aariburo mérõ duyåa. ¹⁰Yaarå, iripoegue marårë marí Opũya kerere weredupiyunerårë güñaka! Marí Opũyare weredeaa waja gajirå ígũsårë ñerõ irinerå ääríma. Ígũya kerere weredupiyunerå gapũ ñerõ tarikereå, ígũyare wereduúbirinerå ääríma. Ígũsårë ñerõ irirårë ñerõ iribirinerå ääríma. Irasirirå musåde ígũså iriderosũta irika! ¹¹Ñerõ tarikereå marí Opũre buremurírë neö piribirinerårë güñarå: “Marí Opũ õårõ iritamunerå, usũyari bokanerå ääríma”, äri güñåa. Iripoeguemu Job wåikũgu ñerõ taridea kerere muså pébu. Ígũ buro ñerõ tarikeregu, marí Opũre buremurírë piribiridí äärímí. Irasirigũ ígũ ñerõ taridero pũru, marí Opũ ígũrë maígũ ígũrë bopoñarí merå íåsíå, wári õärírë iridí äärímí. Irasirirå, ígũ marídere maírírë, ígũ marídere bopoñarí merå íårírë muså masía.

¹²Yaarå, gají yũ wererire goepeyari merå õårõ pëka! Muså gajirårë wererå, äsú äri werebirikõåka: “Ûmugasima merå äsú irigũra”, o “Í nikũma merå äsú irigũra”, åribirikõåka! Muså gajirårë wererå, årikatori marírõ su diayeta wereka! Gajinorë irianerå: “Íriabũ”, årika! “Åsú iriråra”, årírå, irika! “Åsú iribirikõa”, årírå, iribirikõåka! Marípũ wajamoåbirikõåburo, årírå, irasirika!

¹³Muså ñerõ tarirå, Marípũre: “Íritamuka yũre!” äri sërëka! Usũyari merå äärírå, bayapeori merå ígũrë: “Õåtaría mu”, äri, usũyari sika! ¹⁴Sugũ pũríríkũgu, Jesũre buremurå oparårë siuburo. Ígũså ígũrë hũe merå piupee,

marī Opure: “Jesús, īi murē buremugūrē tauka!” āri sērēbosarākuma. ¹⁵Īgūsā marī Opure buremurī merā sērēmakū, marī Opū īgūrē taugūkumi. Irasirigū īgūrē pūrīrī marīgū dujamakū irigūkumi. Pūrīrikuadi ñerō iridi āārīmakū, Marīpū īgū ñerō irideare kātīgūkumi. ¹⁶Irasirirā musā ñerō irideare gāme weretarika! Irasū āārīmakū, Marīpūre musāya āārīburire gāme sērēbosaka! Irasirika, Marīpū musārē pūrīrī marīrā āārīburo, āārīrā! Ōārīrē iririkūgū buro buremurī merā gajrāya āārīburire Marīpūre sērēbosamakū, Marīpū īgū sērērōsūta irigūkumi. ¹⁷Iripoeguemū Marīpūya kerere weredupiyudi Elías wāikūgū marīsūta masakū āārīdi āārīmī. Īgū āārīdeapogue marā ñerō irimakū īāgū,

Marīpūre: “Deko merēbirimakū irika!” āri, buro buremurī merā sērēdi āārīmī. Marīpū īgū sērērīrē pé, ure bojori gaji bojori dekogora, īgūsāya nikūrē deko merēbirimakū iridi āārīmī. ¹⁸Purū Marīpūre: “Deko merēmakū irika doja!” āri sērēdi āārīmī. Īgū sērēmakū, deko merēdero āārībú. Irasū waamakū, īgūsāya nikūrē dupaturi oterī puri dukakudero āārībú.

¹⁹Yaarā, sugū musā merāmū diayema āārīrīrē irinemobirimakū īārā, dupaturi Marīpūyare irimakū irirā, īgūrē ōārō irirā irikoa. ²⁰Ire masika! Musā sugū ñerō irigūre īgū ñerō iririre pirimakū irirā, īgūrē ōārō irirā irikoa. Marīpū īgūrē peamegue waabodire taugūkumi. Īgū wāri ñerī irideare kātīgūkumi.